


Noticia  
Transparente  
di Gobierno

# ISLA ONLINE

Diahuebs 21 Maart 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952

ARTE DI MURAYA  
SAN NICOLAS



STABILIDAD  
Y  
PROSPERIDAD  
2 0 2 4



Gabinete Wever-Croes





PROME MINISTER

Evelyn Wever-Croes



## MENSAHE DI PROME MINISTER RIBA DIA INTERNACIONAL DI DOWN SYNDROME

E aña aki e enfoka ta riba e tema di **"END THE STEREOTYPES"**

**21** di maart mundo ta celebra e Dia Internacional di Down Syndrome.


Prome Minister Evelyn Wever-Croes a remarca cu riba e dia aki ta para keto na e echo cu na Aruba por wak cu personanan cu Down syndrome ta hopi inclusivo y a logra hopi caba pero ainda tin espacio pa haci mas pa nan.

E tema mundialmente pa e dia Internacional di Down syndrome di e aña aki ta "End the Stereotypes". Esaki kiermeen cu frecuentemente personanan cu Down Syndrome ta wordo generalisa na e manera cu ta wak nan como un grupo di persona cu tur ta mescos, pero esaki ta incorrecto. Mescos cu tur otro persona, un persona cu Down Syndrome ta diferente na un otro persona cu Down Syndrome. Nan cada un tin diferente talento, pensamiento, habilidad y gusto y nan bida ta hopi parecido na bida di cualkier otro persona.

"Ta p'esey ta bon pa enfoca riba echo aki y asina nos por yuda un persona cu Down syndrome desaroya su potencial completo. Aki na Aruba tin un comunidad grandi di personanan cu Down syndrome y e personanan special aki semper tin un luga hopi special den mi curason. P'esey awe mi ta pidi tur ciudanano di nos pais, no subestima personanan cu Down syndrome, no exclui nan di nos bida sino duna nan e trato husto, e trato igual, e trato bunita y tuma tempo pa siña conocenan miho. Wak y admira nan talentonan, nan partinan fuerte y asina yuda nan desaroya nan potencial y asina nan por probecha di oportunidadnan igual na nos pais Aruba. Un Aruba unda tin inclusion di tur persona, ta un miho Aruba", Prome Minister a expresa.



# PROME MINISTER TA FELICITA MINISTER ENDY CROES CU UN LOGRO MAS PA DEPORTE



**W**iabierna awor, lo tuma luga e inauguracion di e cancha di basketball completamente renoba den centro di Village na Sanicolas. Prome Minister Evelyn Wever-Croes a expresa di ta sumamente contento di mira proyectonan importante asina wordo cumpli, y ta gradici Minister di Deporte Endy Croes cu a pone su mente y curason den logra cumpli cu deseo di tur e hoben deportistanan cu ta residencia den centro di village.

Durante su bishita na e cancha, Prome Minister por a aprecia e trabou bunita cu a wordo haci. Un cancha completamente renoba cu e palabranan cu semper Minister Croes ta menciona, na momento cu e ta referi su mes na deporte, graba riba e piso di e cancha. E palabranan cu ta; "Desire, Discipline, Dedication and Determination", cu na papiamento ta Deseo, Dedicacion, Disciplina y Determinacion. E 4D'nan cu pa Minister Croes ta palabranan di hopi significacion na momento cu ta papia di hobennan cu kier logra cosnan grandi den deporte. E hobennan aki tin e deseo di practica basketball, e disciplina y dedicacion pa practica e deporte, y e determinacion pa ta miho cu nan por ta. Y e cancha aki full remodela, ta duna cada un di nan e oportunidad pa logra nan meta. Prome Minister a expresa cu e ta un satisfaccion grandi pa mira cu Gobierno ta logra cumpli cu metanan importante pa e hobennan. E cancha aki ta trece hopi oportunidad pa tur esnan cu ta biba den cercania di e cancha y cu tin un amor pa e deporte di basketball.

**“Nos compromiso ta pa percura cu tur nos hobennan tin mas oportunidad pa distraccion sano, pasobra cada hoben cu ta haci deporte ta un menos pa coy e caminda menos bon”**



# VARIOS ENCUENTRO CU PROFESIONALNAN DEN GOBIERNO CU SECRETARIO DI ESTADO Y SU DELEGACION



**D**iaranson ultimo, Prome Minister Evelyn Wever-Croes a reuni cu Secretario di Estado Alexandra van Huffelen cu tawata na Aruba pa un bishita di trabou cortico. Pa cu e bishita aki, a plania varios encuentro den cuadro di e landspakket, cu profesionalnan den Gobierno cu ta trahando riba e diferente temanan, pa asina e por haya un bista kico tur ta haciendo na Aruba den cuadro di e landspakketnan aki.

Prome Minister a indica cu cada kwartaal, Gobierno tin 100 tarea pa ehecuta, pa asina por yega na e reformanan acorda. Durante e encuentronan aki, Secretario di Estado van Huffelen por a haya un miho bista di algun di e temanan.

## Departamento di Recurso Humano

Di Departamento di Recurso Humano, Secretario di Estado y su delegacion a haya un presentacion riba e cambionan den structura di gobernacion. Actualmente ta trahando riba con pa structura y reorganisa e departamentonan di Gobierno pa asina por ofrece un miho servicio na e ciudadanonan.

## Enseñansa

Pa loke ta trata enseñansa, Minister Endy Croes y su profesionalnan a duna un presentacion riba tur e plannan cu tin y e proyectonan cu ya a wordo ehecuta. Un tema cu sigur Secretario di Estado van Huffelen tin hopi atencion p'e.

## AZV

Secretario di Estado van Huffelen y su delegacion tambe a bishita AZV, cu a duna un splicacion amplio riba e plannan y proyeccion pa domina e gastonan di cuida, evitando asina cu e gastonan halto por kibra e fondo cu tin disponibel pa cuida medico. AZV tambe a splica e pasonan dificil cu mester a wordo tuma, pero cu awor danki na e decisionnan aki, actualmente tin un fondo stabiel cu por garantiza cuida medico pa tur ciudadano di pais Aruba pa un tempo largo.

## Departamento di Impuesto

Secretario di Estado y su delegacion tambe a haya un presentacion di departamento di impuesto splicando tur e desaroyonan cu tin andando.

## Encuentro cu "trekkers"

E encuentro cu e profesionalnan di Gobierno cu ta encarga cu tur e accionnan pa cu e landspakket, tambe tabata uno exitoso.

## Prome Minister

Finalmente, Prome Minister tambe a reuni cu Secretario di Estado van Huffelen riba e refinanciamiento di e debe di covid, y con pa baha e interes cu a wordo impone riba pais Aruba. Prome Minister a indica cu e tema a uno complica y cu ta tuma su tempo, pero cu ta bayendo den un bon direccion.



Continuacion REUNION VAN HUFFELEN...

*"Mi tin cu bisa cu e dia di bishita aki tabata uno hopi intensivo, cu hopi reunion y na unda a cubri varios topico. Tur e reunionnan a bay den un bon ambiente, na unda a pone Aruba den un luz sumamente positivo pa e Hulandesnan. Esaki sigur no lo ta e ultimo bishita di Secretario Van Huffelen, y lo bay tin varios otro reunion pa cu e tema di landspakket. Mi ta spera cu pronto nos por cla cu e negociacionnan y por informa pueblo, kico nos como Gobierno a logra yega na dje como palabracion y na bienestar di e pueblo di Aruba," Prome Minister a expresa.*







MINISTER

*Ursell Arends*

# MINISTER URSELL ARENDS TA REENFORSA ESFUERSONAN PA E PROYECTO ESCOLAR DI AGROFORESTERIA

**D**en un esfuerso continuo pa promove e importancia di agricultura sostenibel y siguridad di alimentacion bou di muchanan di Aruba, Minister Ursell Arends a haci un bishita na Scol Basico Washington unda a haya un recepcion caluroso di e alumnonan. Durante e bishita aki a oficialmente instala sprinklers y entrega material dedica na e mantencion di nan hardin di alimentacion, alabes di conbersa cu e muchanan tocante e proyecto.

Scol Basico Washington tabata e prome scol pa planta su propio hardin di alimentacion dia 20 di januari 2024 den cuadro di e proyecto di agroforesteria di Ministerio di Naturalesa. E iniciativa aki lo siña e muchanan e importancia di conoce y aprecia e sector primario y balora siguridad di alimentacion.

Tur scol participando na e proyecto di agroforesteria lo ricibi sker di mata pa e studiantenan por participa activamente den e mantencion di nan hardin, ademas di dos overhead sprinklers.



Na final di e proyecto, e scolnan lo ricibi plachi cu e nomber di e matanan planta, promoviendo reconocimiento y aprecio pa e diversidad di fruta y berdura cu nan ta cosecha. Agroforesteria ta un metodo pa alcanza autosuficiencia y inspira e muchanan pa hiba e pasion pa planta na cas den forma di agricultura familiar.

Un palabra di gradicimento ta bay pa tur e maestronan, mayornan, y boluntarionan cu a contribui, y specialmente pa e ekipo di Santa Rosa y Living Soil, cu nan sosten a haci e hardin di alimentacion un exito.

Un danki special tambe na Sra. Sharine Anthony-Curiel y Sra. Mirla de Cuba di Scol Basico Washington, cu nan dedicacion y liderazgo a haci e proyecto aki uno exitoso na nomber di nan scol. Danki na tur maestro y estudiante cu a representa nan scol awe mainta cu un bunita rendicion di e himno di Scol Basico Washington.

Minister Arends ta contento y agradecido pa e compromiso di nos comunidad pa participa na proyectonan di agricultura y naturalesa en general. Asina contribuyendo pa un futuro unda nos muchanan ta bira e ehempel di speransa y respet pa naturalesa.

Continuacion PROYECTO ESCOLAR....



# Limpi Limpi

MAART 23 - DI 7'OR PA 11'OR DI MAINTA

BAKI DEN BARIO SAN NICOLAS  
DILANTI PITSTOP/BENU

LIMPI.AW





MINISTER

*Geoffrey Wever*



**ARUBA TIN  
POTENCIAL  
GRANDI PA  
INVERSIONISTANAN  
HULANDES**



Continuacion ARUBA TIN POTENCIAL....



**D**en Haag – Riba 21 di maart durante e recepcion pa celebra Dia di Himno y Bandera, Minister Geoffrey Wever a elabora riba Aruba su potencial grandi pa inversionistanan Hulandes. E recepcion a wordo organisa pa Minister Plenipotenciario, Sr. Juan "Ady" Thijsen, y a conta cu presencia di diferente embahador y/of nan representante.

Durante e recepcion, Minister Geoffrey Wever a elabora riba e potencial grandi cu Aruba tin pa e mercado y inversionistanan Hulandes. E recepcion cu representacion di embahadanan ta forma parti di e strategia di gobierno di Aruba pa ‘showcase’ Aruba como un destinacion atractivo pa inversionnan.

Pa stimula desaroyo economico ta importante pa ta

proactivo y muestra e potencial grandi di Aruba. E “Aruba Investment Summit 2024” ta un instrumento importante den maneho pa showcase e oportunidadnan cu Aruba su economia ta ofrece.

“Ta importante pa como Pais hunto nos pusha pa logra atrae inversionnan cu ta esencial pa garantisa desaroyo economico di Aruba. Nos mester ta agresivo den nos buscada pa inversion y no para warda nan yega cerca nos” segun minister Geoffrey

Minister Geoffrey Wever kier gradici Minister Plenipotenciario, Sr. Juan "Ady" Thijsen, y directora Sra. Joselin Croes pa e invitacion y cooperacion pa hunto showcase e oportunidadnan di Aruba. Tambe un palabra di danki ta bai pa henter e ekipo di Arubahuis.

# CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM





**D**ia 11 di maart ultimo, Minister Endy Croes a reuni cu e representantenan di NHL Stenden University. E universidad ta situa na Leeuwarden, Hulanda y ta traha cu hopi universidad rond di mundo. Recientemente, Universidad di Aruba a firma un “Memorandum of Understanding” (MoU) pa, entre otro, e programa di intercambio “Gran Tour” cu lo inicia na luna di september proximo.

E programa aki ta brinda e studiantenan di aña tres di e estudio “Hospitality Management” e oportunidad pa studia un semester na Aruba. E studiantenan aki lo

hospeda den nos centro di ciudad cu e vision pa crea mas movecion y bida na Oranjestad. E intercambio aki lo sosode dos bes pa aña, den luna di september y februari. Dia 11 di maart ultimo, Minister Endy Croes hunto cu colega Minister Geoffrey Wever a firma un otro acuerdo pa traha di cerca den colaboracion cu e “beroepsscholen”, entre otro, Colegio EPI.

Minister Endy Croes a indica cu den luna di april proximo e representantenan di NHL Stenden University lo ta na Aruba un bes mas pa firma un MoU cu Colegio EPI.







**Minister Endy Croes:**

## **A RICIBI BISHITA DI SECRETARIA DI ESTADO SRA. ALEXANDRA VAN HUFFELEN Y DELEGACION DI TWO**

**D**iaranson mainta, Minister di Enseñansa y Deporte Endy Croes hunto cu Prome Minister Evelyn Wever-Croes a ricibi bishita di secretaria di estado Sra. Alexandra van Huffelen hunto cu ful un delegacion di Tijdelijke Werkorganisatie (TWO) di Hulanda y Vertegenwoordiging van Nederland in Aruba (VNO).

Tambe presente durante e reunion aki tabata directora Anne-Marie Proveyer y directora suplente Sheila Maduro di Departamento di Enseñansa (DEA), kendenan hunto cu e mandatario di Enseñansa a duna un presentacion amplio na e delegacion di Hulanda encuanto enseñansa di Aruba. A trata entre otro, PEN 2023, SDG 4, e vision

cu ta enseñansa den transicion 2021-2025. Ademas di esaki, a splica tocante e trabounan cu ta haciendo, en conexon cu e recomendacionnan di e Doorlichting van het Arubaanse Onderwijsbestel.

Minister Endy Croes a splica e delegacion tur e trabounan cu a haci caba y cual ta e trabounan cu ta trahando di cerca cu TWO. Fuera di esaki, a duna nan un splicacion encuanto e trabounan cu ta haci riba nivel di Vierlandenoverleg. E delegacion a haci diferente pregunta, unda Minister Endy hunto cu Prome Minister Evelyn Wever-Croes y team di DEA a duna contestacion. Finalmente, secretaria di estado y e delegacion di Hulanda a keda impresiona di e trabounan cu Minister Endy Croes ta haciendo riba tereno di enseñansa.







Arte di Muraya na San Nicolas no ta simplemente  
verf riba bloki. E creatividad, fantasia y color riba e  
murayanan ta un fuente di inspiracion di artistanan  
pa encurasha nos pa brasa e poder di creatividad y  
colaboracion na nos barionan di Aruba.

**2024**

AÑA DI STABILIDAD Y PROSPERIDAD